



## Inatsisartut

*Aningaasaqarnermut Ataatsimiititaliap  
Finansudvalget*

Ulloq/Dato: 16. august 2011  
J.nr.: 01.31.06/11-00546

### Aningaasaqarnermut Naalakkersuisoq

#### **Aningaasaqarnermut Ataatsimiititaliap suliaq nr. 01.31.06/11-00546 pillugu ataasin-gornermi ulloq 15. august 2011-mi aalajangiineranik Naalakkersuisunut ilisimatitsineq.**

#### **Missingersuutitut sunniuteqanngitsumik peqqinnissaqarfimmi suliassanik nikisiterineq**

Naalakkersuisut **inassutigaa**t,

- kontumi pingaarnermi 80.00.00 Sanaartornermut atugassat agguanneqanngitsut, aningaasaliissutit 2011-mi 8,3 mio. kr.-inik ikilisinneqassasut, aamma
- kontumi pingaarnermi 86.60.01 Peqqinnissaqarfik, aningaasaliissutit 8,3 mio. kr.-inik amerlineqassasut, agguarneranni suliassamut nr. 110.47.034 elevatori nutaaq, Qasigiannugit 0,9 mio. kr.-inik ikilisinneqassasut, suliassamut nr. 010.47.033 Atuarfimmi kigutileriffik, Nanortalik, aningaasaliissutit 1,9 mio. kr.-inik amerlineqassasut, suliassamut nr. 120.47.035 Ilulissani napparsimmaviup allineqarnissaa, aningaasaliissutit 5,0 mio. kr.-inik amerlineqassasut, aamma suliassamut nr. 110.47.037 Kigutileriffiup nuunneqarnissaa, Qasigiannugit, aningaasaliissutit 1,3 mio. kr.-inik amerlineqassasut, aamma suliassamut nr. 060.48.012 Kigutileriffik, Qinngorput, aningaasaliissutit 2011-mi 1,0 mio. kr.-inik amerlineqassasut, aamma
- kontumi pingaarnermi 80.00.00 Sanaartornermut atugassat agguanneqanngitsut, aningaasaliissutit 2012-imi 10,1 mio. kr.-inik ikilisinneqassasut, aamma
- kontumi pingaarnermi 86.60.01 Peqqinnissaqarfik, aningaasaliissutit 10,1 mio. kr.-inik amerlineqassasut, agguarneranni suliassamut nr. 060.48.012 Kigutileriffik, Qinngorput, aningaasaliissutit 5,0 mio. kr.-inik amerlineqassasut, aamma suliassamut nr. 120.47.035 Ilulissani napparsimmaviup allineqarnissaa, aningaasaliissutit 2012-imi 5,1 mio. kr.-inik amerlineqassasut.

#### **Aningaasaqarnermut Ataatsimiititaliap oqaaseqaatai**

Peqqinnissanut tunngasuni aningaasaliissutinik nuussinissat arlallit Naalakkersuisut suliarni matumani qinnutigaa. Tamanna arlalinnik oqaaseqaateqarnissamik pisariaqalersitsivoq.

Nanortalimmi atuarfimmi kigutileriffik pillugu suliassaq pillugu immikkoortoq isummernissamut tunngavissiami allassimasoq ataatsimiititaliamit immikkut maluginiarneqarpoq, tassa immikkoortumi tassani kisitsisit kingullertut allassimasut isummernissamut tunngavissiap inassuteqaatitaanni kisitsisinut naapertuutinnimmata. Tamatumani immikkut pineqarput aningaasat Ilulissani napparsimmavik pillugu allassimasut. Kisitsisit inassuteqaatini allassimasut eqqortutut isigalugit ataatsimiititaliap tunngavissaatippai. (1) Aningaasat allassimasut misissoqqullugit pisariaqarpallu isummernissamut tunngavissiamik nutaamik eqqortumillu ataatsimiititaliamut nassiusseqqullugit Naalakkersuisut qinnuigineqarput.

Tamatuma saniatigut Qinngutsinni kigutileriffissatut pilersaarummut aningaasaliissutit katil-lugit 6 mio. kr.-inik amerlineqarnissaat qinnutigineqartoq ataatsimiititaliap maluginiarpa.

Tamanna eqqumiiginarpoq, tassami tamatuma kingorna pilersaarummut aningaasaliissutit 8 mio. kr.-inngormata. Taamaalilluni december 2010-mi pilersaarummut aningaasaliussanik nuussinissamik Naalakkersuisut qinnuteqarmata taamani aningaasat annertussusaattut pilersaarummut aningaasaliissutit tamakkiisut maanna annertussuseqaqqilerput. Suliami 10-508-imi Aningaasaqarnermut Ataatsimiititaliap 8. december 2010-mi aalajangiinera inner-suussutigineqarpoq. Aalajangiinermi tassani ataatsimiititaliaq ilaatigut ima allappoq:

*”Qinngorpumi kigutileriffiup sipaaruteqarfigineqarneranut tunngatillugu kommunip Peqqinnissaqarfyllu oqaloqatiginerat ingerlanneqartoq Naalakkersuisumik apersuinnermi ataatsimiititaliamut ilisimatitsissutigineqarpoq. Taamaalillunilu naak missinngersuutit 8 mio. kr.-init 6 mio. kr.-inut ikilileriffigineqaraluartut kigutileriffiup ilusiligaanera pillugu naammaginartumik isumaqatigiissuteqartoqassasoq naatsorsuutigineqarpoq. Aningaasaqarnermulli Ataatsimiititaliamit paasineqarpoq aningaasaliissutinik ikililerinerup kingunissai ilisimaneqanngitsut, tamannalu naammaginangilaq.”*

(2) Qinngutsinni kigutileriffimmut tunngasup ingerlasimanera pakatsissutigalugu ataatsimiititaliap oqaatigissavaa. Pilersaarutaaqqaartut Qinngutsinni atuarfiup sananeqarneranut atatilugu kigutileriffiliortoqarsimappat akikinnerusimassagalarpoq kiisalu pilersaarummut tunngatillugu aningaasaliissutinik aqutsineq siunissami pilersaarutaasartussat eqqarsaatigalugit annertuumik eqqarsaatissinneqarnermik kinguneqartariaqarluni.

(3) Tamatuma saniatigut ilaatigut missingersuutinut ilanngussat oqaasertaanni kukkunialunnik arlalinnik peqartoq ataatsimiititaliap maluginiarpaa, taamaattumillu isummernissamut tunngavissiat Aningaasaqarnermut Ataatsimiititaliamit suliarineqartussat pitsaassusiannik sukuumiisumik misissuisarnissamik kukkunersiorneqartarnissaannillu Naalakkersuisunut eqqaasissutigineqartariaqarluni.

#### **Aningaasaqarnermut Ataatsimiititaliap aalajangiinera**

Siuliani allassimasutut paasinnilluni Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput.**

Aningaasaqarnermut Ataatsimiititaliaq sinnerlugu

Olga P. Berthelsen  
Aningaasaqarnermut Ataatsimiititaliap siulittaasua